

## Li rintréye al sicole di walon

C'èst l' tims di s' rimète abîye au walon,  
Èt Ane-Mariye, Téje, li Bêrt èt tos l's-ôtes  
Sont tortos al fièsse.

Feller lèzî va co d'ner dès maus d' tièsse.  
Mins tos lès novias qu'ont d' l'aè à r'vinde  
Front l' mawe quand Chantal va sôrti s' djârgon,  
Sondjî qu'on l'zî a djouwé one bèle quinte.

\*\*\*

'L èst fwârt coût l' tims qu'on studîye l' vraî walon,  
Wou ç' qu'on spèpîye sins fé afîye toubac'  
Totes lès ratoûrnûres.  
Ostant d' riyaudès-eûres, dès-èsclamûres,  
Dizeû nos pâjes di scolîs aeuris.

'L èst fwârt coût l' tims qu'on studîye l' vraî walon,  
One tote vîye dintèle qui n'a pont pris d' plis.

\*\*\*

Quand n's-î sèrans au tims do bon walon,  
I n' faut nin awè peû do l' situdî,  
Fioz tot vosse possibe.  
Èt minme si ç' lingadje là vos chone pènibe,  
Gn-aurè dès momints d' solia èt d' coleûr.  
Quand n's-î sèrans au tims do bon walon,  
C'èst tote si creûjète qui frè bate vosse keûr.

\*\*\*

Dj'î vin voltî al sicole di walon.  
C'èst di ç' bon tims là qui dj'aude rin qu' por mi  
Sès mèyeûs sov'nances.  
Nos bonès dames di scole, plin.nes d'induljences,  
Coridjenut djintimint totes mès-èreûrs.  
Dj'î vin voltî al sicole di walon  
Po-z-î trover saquants bouchîyes d' tchaleûr.

Pierre Lazard  
Li Wayin  
Oct.2011